

ԹԻՎ 30 ՏԱՐԱԾՔԱՅԻՆ ԸՆՏՐԱԿԱՆ ՀԱՆՁՆԱԺՈՂՈՎ

21 հունվարի 2022թ.

ք. Գյումրի

Ո Ր Ո Շ ՈՒ Մ N 1 -Ա

**ՄԵՐԳԵԼ ՂԱՐԻՔՅԱՆԻ, ՀԱՅԿ ՆԻԿՈԼՅԱՆԻ, ԱՐՄԵՆԱԿ ԱՐԱՄՅԱՆԻ,
ՍՈՒՋԱՆՆԱ ՄԱՆՈՅԱՆԻ, ԳՐԻԳՈՐ ՊԵՏՐՈՍՅԱՆԻ, ԱՆԱՀԻՏ ՄԵԼՔՈՆՅԱՆԻ
ՆԵՐԿԱՅԱՑՈՒՑԻՋ, ՓԱՍՏԱԲԱՆ ՄՀԵՐ ՇԱՀՆԱԶԱՐՅԱՆԻ ԴԻՄՈՒՄԻ ՄԱՍԻՆ**

Ուսումնասիրելով Կենտրոնական ընտրական հանձնաժողովի կողմից 27.12.2021թ. վերահասցեագրման կարգով թիվ 30 ընտրատարածքային ընտրական հանձնաժողովին ուղարկված դիմողներ Մերգել Մուրադի Ղարիբյանի և մյուսների ներկայացուցիչ, փաստաբան Մհեր Շահնազարյանի 23.12.2021թ. դիմումը՝ թիվ 30 ընտրատարածքային ընտրական հանձնաժողովը

Պ Ա Ր Զ Ե Ց.

1. Դիմումատուի իրավական դիրքորոշումը և ներկայացված պահանջը

Դիմողներ՝ Մերգել Մուրադի Ղարիբյանի, Հայկ Բագրատի Նիկոլյանի, Արմենակ Արամի Արամյանի, Սուզաննա Եղիշի Մանոյանի, Գրիգոր Հովհաննեսի Պետրոսյանի և Անահիտ Զիլիմխանի Մելքոնյանի ներկայացուցիչ, փաստաբան Մհեր Շահնազարյանը 2021 թվականի դեկտեմբերի 23-ին էլեկտրոնային հարցումների միասնական հարթակի միջոցով Կենտրոնական ընտրական հանձնաժողովին ուղարկել է դիմում, որը Կենտրոնական ընտրական հանձնաժողովը 2021 թվականի դեկտեմբերի 27-ի 01-1231 գրությամբ վերահասցեագրել է թիվ 30 տարածքային ընտրական հանձնաժողովին: Ներկայացված դիմումում նշված է.

«1. Դիմումի փաստերն ու հիմքերը

▪ ՀՀ Շիրակի մարզի Ամասիա խոշորացված համայնքը բաղկացած է հետևյալ բնակավայրերից. Ամասիա, Արեգնադեմ, Գտաշեն, Կամխուտ, Ողջի, Բյուրակն, Մեղրաշատ, Հովտուն, Բանդիվան, Զրաձոր, Շաղիկ, Գառնառիճ, Ծաղկուտ, Զորակերտ, Բերդաշեն, Աղվորիկ, Արդենիս, Ալվար, Զարիշատ:

▪ Համայնքի վերջին խոշորացումը պայմանավորված է եղել 2016թ-ին խոշորացված Ամասիա և Արփի խոշորացված համայնքների խոշորացմամբ:

▪ ՀՀ Շիրակի մարզի Ամասիա խոշորացված համայնքի ընտրություններին մասնակցելու իրավունք ունեցող 5476 անձ է, որից ընտրությանը մասնակցել է 3195 ընտրող, որը կազմում է ընդհանուր ընտրողների 58.35 տոկոսը:

▪ Ընտրությանը մասնակցել են երեք դաշինքներ ՔՊ կուսակցության, Հանրապետական կուսակցության և Արփի-Ամասիա կուսակցությունների դաշինքը:

▪ 05.12.2021 թ-ին ՀՀ Շիրակի մարզի Ամասիա խոշորացված համայնքում տեղի ունեցան համայնքի ավագանու անդամների ընտրություններ:

- Մերգել Ղարիբյանը և մյուսները ընտրություններին մասնակցել են Քաղաքացիական Պայմանագիր կուսակցության Ընտրական ցուցակով:

- Ընտրական ցուցակը ղեկավարել է Մերգել Ղարիբյանը: Ցուցակում ընդգրկված են եղել 32 ավագանու անդամության թեկնածուներ:

- 05.12.2021թ-ին տեղի ունեցած ընտրությունների արդյունքում Մերգել Ղարիբյանի կողմից ՔՊ կուսակցության օգտին քվեարկել են 1217 ընտրող, որն էլ իր հերթին կազմում է ընդհանուր ընտրողների 38.84 տոկոսը:

- ՔՊ կուսակցության ընտրական ցուցակով մանդատ ստացած ավագանու 6 անդամները չեն միացել Հանրապետական կուսակցությանը և Արփի-Ամասիա կուսակցությունների դաշինքին ներկայացնող ավագանու անդամներին:

- 13.12.2021թ-ին ՔՊ կուսակցության Ընտրական ցուցակի 32 ավագանու անդամության թեկնածուները նոտարական կարգով վավերացված դիմումներով հրաժարվել են իրենց մանդատներից:

- Թիվ 30 ընտրատարածքային Հանձնաժողովի կողմից 16.12.2021թ-ին կայացվել է թիվ 27-Ա որոշումը ՔՊ ընտրական ցուցակով ավագանու անդամների թեկնածուների գրանցումն ուժը կորցրած ճանաչելու մասին:

2. Իրավական հիմնավորումներ.

Գտնում եմ, որ սույն դիմումը հիմնավոր է, բխում է համապատասխան իրավական ակտերից և ենթակա է բավարարման հիմքում ունենալով ներքոհիշյալ պատճառաբանություններն ու հետևությունները:

Ազատ ընտրությունների իրավունքը երաշխավորված է Մարդու իրավունքների եվրոպական կոնվենցիայով: Այն քաղաքական իշխանության չարաշահման դեմ ուղղված ժողովրդավարական բոլոր երաշխիքներից ամենահիմնարարն է: Իրական և իրավական ընտրությունները պայմանավորում են ընտրության հենքով կազմավորվող մարմիններին արդյունավետ գործունեությանը: Տեղական ինքնակառավարման ոլորտում համամասնական կարգով, ուղղակի ընտրական իրավունքի իրացմամբ է ձևավորվում տեղական ինքնակառավարման ներկայացուցչական մարմինը՝ ավագանին:

Համաձայն ՀՀ Ընտրական օրենսգիրք Սահմանադրական օրենքի 4-րդ հոդվածի Ընտրություններն անցկացվում են ընտրական իրավունքի իրականացման՝ ազատության և կամավորության սկզբունքների հիման վրա: Ոչ ոք իրավունք չունի պարտադրելու ընտրողին քվեարկելու որևէ թեկնածուի (կուսակցության) օգտին կամ դեմ, ինչպես նաև հարկադրելու ընտրողին մասնակցելու կամ չմասնակցելու ընտրություններին:

Համաձայն Ընտրական օրենսգիրք Սահմանադրական օրենքի 7-րդ հոդվածի՝ Ազգային ժողովի և տեղական ինքնակառավարման մարմինների ընտրություններն անցկացվում են պարբերաբար՝ Սահմանադրությամբ և սույն օրենսգրքով սահմանված ժամկետներում: Նույն օրենքի 129-րդ հոդվածի համաձայն՝ համամասնական ընտրակարգով անցկացվող համայնքների ավագանու անդամի թեկնածուներ առաջադրելու իրավունք ունեն կուսակցությունները և կուսակցությունների

դաշինքները: Թեկնածուն կարող է առաջադրվել միայն մեկ կուսակցության ընտրական ցուցակով:

Նույն օրենքի 137-րդ հոդվածի 2-րդ մասի համաձայն՝ կուսակցությունը քվեարկության օրվանից ոչ ուշ, քան 10 օր առաջ՝ մինչև 18.00-ն, իրավունք ունի ներկայացնելու ինքնաբացարկի մասին դիմում:

Իսկ նույն իրավական ակտի 141-րդ հոդվածի 9-րդ մասի համաձայն՝ կուսակցության (կուսակցությունների դաշինքի) ընտրական ցուցակում ընդգրկված անձանց կողմից ներկայացված ինքնաբացարկի կամ մանդատից հրաժարվելու դիմումները վավերացվում են նոտարական կարգով, կամ համապատասխան դիմումը անձը հաստատում է ընտրական հանձնաժողովի նիստում: Նոտարական կարգով վավերացված՝ ինքնաբացարկի կամ մանդատից հրաժարվելու մասին դիմումը սույն հոդվածի իմաստով համարվում է վավեր, եթե այն ընտրական հանձնաժողով է ներկայացվում վավերացվելուց հետո՝ առավելագույնը եռօրյա ժամկետում:

Ինչպես նկատում ենք, ընտրված ավագանու անդամի լիազորությունները, նրա ավագանու կարգավիճակը դադարում են՝

- Ինքնաբացարկի վերաբերյալ գրավոր կամքի արտահայտմամբ և
- Մանդատից հրաժարվելու մասին միաժամանակյա դիմում ներկայացնելու ձևով:

Սույն դիմումին կից ներկայացվող փաստաթղթերից նկատում ենք, որ նշված ակնհայտ իրավական պահանջները բավարարված են ամբողջությամբ:

Ինչպիսի հետևանքներ կառաջացնի Ամասիա խոշորացված համայնքի ՔՊ կուսակցության ընտրացուցակով ընտրված ավագանու անդամների մանդատից հրաժարվելն այն դեպքում ավագանու անդամների քանակը սահմանված է 15 ավագանու անդամ և ինչպիսի հետևանքներ կառաջացնի թիվ 30 Տարածքային ընտրական հանձնաժողովի 27-Ա որոշումը ՔՊ ավագանու ընտրական ցուցակի ողջ անդամների գրանցումն ուժը կորցրած ճանաչելու մասին որոշումը: Տվյալ դեպքում ավագանու անդամների թվաքանակը սահմանված և ցուցված է օրենքով. Այսպես. Համաձայն ՀՀ ընտրական օրենսգիրք Սահմանադրական օրենքի 104.1-րդ հոդվածի 6-րդ մասի՝ Համայնքի ավագանին բաղկացած է՝ 1) հինգ անդամից՝ մինչև 1000 ընտրող ունեցող համայնքում ... 4) տասնհինգ անդամից՝ 4001-ից 10000 ընտրող ունեցող համայնքում:

Համաձայն ՀՀ Ընտրական օրենսգիրք Սահմանադրական օրենքի 135.1 հոդվածի 1-ին մասի 5-րդ կետի համաձայն՝ համամասնական ընտրակարգով անցկացվող՝ համայնքի ավագանու ընտրությունը համարվում է չկայացած, եթե՝ սույն օրենսգրքով սահմանված կարգով մանդատների բաշխման արդյունքով չի ձևավորվել համայնքի ավագանու 2/3-ը: Տվյալ դեպքում ավագանու 6 անդամի բացակայությունը հանգեցնելու է ավագանու 9 անդամի առավելագույն քանակի առկայությունը, որը պակաս է օրենքով սահմանված 2/3-ից: Այսինքն գործ ունենք օրենքի ուժով չձևավորված մարմնի՝ ավագանու հետ, նաև չկայացած ընտրության հետ:

Համաձայն Տեղական ինքնակառավարման Եվրոպական Խարտիայի 3-րդ հոդվածի՝ 1. Տեղական ինքնակառավարում հասկացություն նշանակում է՝ տեղական

ինքնակառավարման մարմինների իրավունքը և կարողությունը՝ կանոնակարգելու և կառավարելու պետական գործերի զգալի մասը (օրենքի շրջանակներում)՝ սեփական պատասխանատվությամբ և տեղական բնակչության շահերից ելնելով: Այդ իրավունքը իրականացվում է խորհուրդների կամ ժողովների կողմից, որոնց անդամները ընտրված են ազատ, փակ գաղտնի, հավասար, ուղղակի և համընդհանուր քվեարկության ճանապարհով: Խորհուրդները կամ ժողովները կարող են ունենալ հաշվետու գործադիր մարմիններ: Այս դրույթը չի բացառում քաղաքացիների՝ ժողովին, հանրաքվեին կամ քաղաքացիների ուղղակի մասնակցության այլ ձևի դիմելը այնտեղ, որտեղ դա թույլատրվում է օրենքով:

Եվրոպական խարտիայի այս իրավանորմը համադրելով ՀՀ Սահմանադրության 2-րդ, 6-րդ և 9-րդ հոդվածների հետ, ստացվում է, որ գործ ունենք ՀՀ Սահմանադրության հիմքով չձևավորված տեղական ինքնակառավարման մարմնի հետ, որի հիմքում ընկած է չկայացած ընտրությունը:

ՀՀ տեղական ինքնակառավարման մասին օրենքի 6-րդ հոդվածի համաձայն՝ տեղական ինքնակառավարման մարմիններն են համայնքի ավագանին և համայնքի ղեկավարը, որոնք ընտրվում են հինգ տարի ժամկետով: ... Համայնքի ավագանին համայնքի ներկայացուցչական մարմին է և իրականացնում է Հայաստանի Հանրապետության Սահմանադրությամբ, սույն օրենքով և այլ օրենքներով նախատեսված լիազորություններ: ... Համայնքի ավագանին լիազորություններն ստանձնում է ոչ շուտ, քան նախորդ ավագանու լիազորությունների ժամկետի ավարտման հաջորդ օրը: համայնքի ղեկավարը համայնքի գործադիր մարմինն է, ներկայացնում է համայնքը և իրականացնում է Հայաստանի Հանրապետության Սահմանադրությամբ, սույն օրենքով և այլ օրենքներով նախատեսված լիազորությունները:

Ակնհայտ և անհերքելի է, որ ՀՀ տեղական ինքնակառավարման մասին օրենքի 6-րդ հոդվածի տեսանկյունից գործ ունենք՝

- Չկայացած ընտրության հետ, որի արդյունքում գործ ունենք՝
- Սահմանադրորեն չձևավորված ավագանու հետ,
- Չընտրված, իսկ եթե ընտրվել է, ապա ՀՀ Սահմանադրության և այլ իրավական ակտերի պահանջների կոպիտ խախտմամբ ընտրված համայնքի ղեկավարի հետ:
- Նոր ընտրություն անցկացնելու իրավական անհրաժեշտության հետ:

Հաջորդը. անհրաժեշտ է ի նկատի ունենալ, թիվ 30 ընտրատարածքային Հանձնաժողովի 16.12.2021թ-ի թիվ 27-Ա որոշումը վերաբերվում է ՔՊ կուսակցության ընտրական ցուցակի ողջ թեկնածուներին: Նման պարագայում կստացվի որ նախ 5476 ընտրողից հաշվառման է ենթակա 1978 քվեները, այսինքն ընտրության իրավունք ունեցող անձանց 31 տոկոսը:

Դատելով ՀՀ Ընտրական օրենսգիրք Սահմանադրական օրենքի 135/1-րդ հոդվածի էությունից ակնհայտ է, որ օրենքի տառացի մեկնաբանության պայմաններում գործ ունենք չկայացած ընտրության հետ և նոր ընտրություններ անցկացնելու իրավաբանորեն պարտադրված անհրաժեշտության հետ: Նշվածը բխում

է նաև ՀՀ Նորմատիվ իրավական ակտերի մասին օրենքի 41-րդ հոդվածից, համաձայն որի նորմատիվ իրավական ակտի նորմը մեկնաբանվում է՝ հաշվի առնելով նորմատիվ իրավական ակտն ընդունելիս այն ընդունող մարմնի նպատակը՝ ելնելով դրանում պարունակվող բառերի և արտահայտությունների տառացի նշանակությունից, ամբողջ հոդվածի, գլխի, բաժնի կարգավորման համատեքստից, այն նորմատիվ իրավական ակտի դրույթներից, ի կատարումն որի ընդունվել է այդ ակտը, տվյալ նորմատիվ իրավական ակտով սահմանված սկզբունքներից, իսկ այդպիսի սկզբունքներ սահմանված չլինելու դեպքում՝ տվյալ իրավահարաբերությունը կարգավորող իրավունքի ճյուղի սկզբունքներից:

3. Պահանջ.

Հիմք ընդունելով վերոգրյալը և ղեկավարվելով ՀՀ ընտրական օրենսգիրք Սահմանադրական օրենքի 119, 121, 135.1-րդ հոդվածներով, ՀՀ Վարչարարության հիմունքների և վարչական վարույթի մասին օրենքի 30, 31 և 53-րդ հոդվածներով խնդրում եմ.

- Ընդունել որոշում ՀՀ Շիրակի մարզի Ամասիա խոշորացված համայնքի ավագանու անդամների 05.12.2021թ-ի ընտրությունները չկայացած համարելու մասին.

- ՀՀ Շիրակի մարզի Ամասիա համայնքի ղեկավարի 20.12.2021թ-ի ընտրությունը ճանաչել ապօրինի և վերացնել համայնքի ղեկավարի ընտրության մասին արձանագրությունը և/կամ որոշումը:»:

Դիմումին կից ներկայացվել են դիմումատուներ Մերգել Մուրադի Ղարիբյանի, Հայկ Բագրատի Նիկոլյանի, Արմենակ Արամի Արամյանի, Սուզաննա Եղիշի Մանոյանի, Գրիգոր Հովհաննեսի Պետրոսյանի և Անահիտ Զիլմխանի Մելքոնյանի անձը հաստատող փաստաթղթերի պատճենները, վերջիններիս կողմից տրված լիազորագրի պատճենը և դիմումատուների ներկայացուցիչ, փաստաբան Մհեր Շահնազարյանի փաստաբանական գործունեության արտոնագրի պատճենը:

2. Թիվ 30 ընտրատարածքային ընտրական հանձնաժողովի հիմնավորումները (պատճառաբանությունները) և եզրահանգումը

«Հայաստանի Հանրապետության ընտրական օրենսգիրք» Հայաստանի Հանրապետության սահմանադրական օրենքի (այսուհետ՝ Ընտրական օրենսգիրք) 135.1. հոդվածի 1-ին մասի համաձայն. «Համամասնական ընտրակարգով անցկացվող՝ համայնքի ավագանու ընտրությունը համարվում է չկայացած, եթե՝

- 1) ընտրություններին մասնակցող կուսակցությունների (կուսակցությունների դաշինքների) ընտրական ցուցակների գրանցման համար սույն օրենսգրքով սահմանված ժամկետում և կարգով որևէ կուսակցություն (կուսակցությունների դաշինք) չի առաջադրվել, կամ

- 2) որևէ կուսակցություն (կուսակցությունների դաշինք) սույն օրենսգրքով սահմանված ժամկետում և կարգով չի գրանցվել (գրանցումը մերժվել է).

- 3) առաջադրված բոլոր կուսակցությունները գրանցման համար սույն օրենսգրքով սահմանված ժամկետից հետո ներկայացրել են ինքնաբացարկի մասին դիմում.

4) կուսակցությունների (կուսակցությունների դաշինքների) ընտրական ցուցակներում ընդգրկված թեկնածուների ընդհանուր թիվը պակաս է սույն օրենսգրքով սահմանված՝ համայնքի ավագանու անդամների թվից, և թեկնածուների ցանկը սույն օրենսգրքի 130-րդ հոդվածի 2-րդ մասով սահմանված կարգով և ժամկետում չի համալրվել:

5) սույն օրենսգրքով սահմանված կարգով մանդատների բաշխման արդյունքով չի ձևավորվել համայնքի ավագանու 2/3-ը»:

Ներկայացված դիմումում վկայակոչվել է Ընտրական օրենսգրքի 135.1. հոդվածի 1-ին մասի 5-րդ կետը, որում, որպես համամասնական ընտրակարգով անցկացվող՝ համայնքի ավագանու ընտրությունը չկայացած համարելու հիմք, սահմանված է. «սույն օրենսգրքով սահմանված կարգով մանդատների բաշխման արդյունքով չի ձևավորվել համայնքի ավագանու 2/3-ը»: Բացի այդ, դիմումատուները, հիմք ընդունելով նշված դրույթը, դիմումում նշել են. «Տվյալ դեպքում ավագանու 6 անդամի բացակայությունը հանգեցնելու է ավագանու 9 անդամի առավելագույն քանակի առկայությանը, որը պակաս է օրենքով սահմանված 2/3-ից: Այսինքն գործ ունենք օրենքի ուժով չձևավորված մարմնի՝ ավագանու հետ, նաև չկայացած ընտրության հետ»:

Վկայակոչված դրույթի վերլուծությունը թույլ է տալիս կատարել եզրահանգում, որ վերոնշյալ կարգավորումը վերաբերում է այն դեպքին, երբ Ընտրական օրենսգրքի 141-րդ հոդվածի 4-րդ մասով սահմանված կարգով մանդատների բաշխման արդյունքով չի ձևավորվել համայնքի ավագանու 2/3-ը:

Այսպես, Ընտրական օրենսգրքի 104.1. հոդվածի 6-րդ մասի համաձայն. «Համայնքի ավագանին բաղկացած է՝

- 1) հինգ անդամից՝ մինչև 1 000 ընտրող ունեցող համայնքում.
- 2) յոթ անդամից՝ 1 001-ից 2 000 ընտրող ունեցող համայնքում.
- 3) ինն անդամից՝ 2 001-ից 4 000 ընտրող ունեցող համայնքում.
- 4) տասնհինգ անդամից՝ 4001-ից 10 000 ընտրող ունեցող համայնքում.
- 5) քսանմեկ անդամից՝ 10 001-ից 25 000 ընտրող ունեցող համայնքում.
- 6) քսանյոթ անդամից՝ 25 001-ից 70 000 ընտրող ունեցող համայնքում.
- 7) երեսուներեք անդամից՝ 70001-ից մինչև 300 000 ընտրող ունեցող համայնքում.
- 8) վաթսուներեք անդամից՝ 300 000-ից ավելի ընտրող ունեցող համայնքում»:

Նույն հոդվածի 7-րդ մասը սահմանում է, որ ընտրողների թիվը յուրաքանչյուր համայնքի համար հաշվարկվում է՝ հիմք ընդունելով լիազոր մարմնի կողմից՝ ըստ համայնքների և ընտրական տեղամասերի, տրամադրված տեղեկանքում նշված ընտրողների թիվը»:

Նշված տեղեկանքում Շիրակի մարզի Ամասիա համայնքի ընտրողների թիվն է՝ 5696: Ըստ ընտրողների թվի՝ Շիրակի մարզի Ամասիա համայնքի ավագանին պետք է բաղկացած լինի 15 անդամից՝ հիմք ընդունելով Ընտրական օրենսգրքի 104.1. հոդվածի 6-րդ մասի 4-րդ կետի կարգավորումը:

Շիրակի մարզի Ամասիա համայնքի ավագանու համամասնական ընտրակարգով ընտրություններն անցկացվել են 2021 թվականի դեկտեմբերի 5-ին:

Ընտրական օրենսգրքի 141-րդ հոդվածի 2-րդ մասի համաձայն՝ «Տարածքային ընտրական հանձնաժողովը սույն օրենսգրքի 74-րդ հոդվածով սահմանված կարգով քվեարկության օրվանից հետո՝ 7-րդ օրը, ամփոփում է համայնքների (բացառությամբ Երևանի) ավագանիների ընտրությունների արդյունքները և ընդունում հետևյալ որոշումներից մեկը՝

- 1) համապատասխան համայնքների ավագանիներ ընտրվելու մասին.
- 2) առանձին ընտրական տեղամասերում վերաքվեարկություն նշանակելու մասին.
- 3) համապատասխան համայնքների ավագանիների ընտրություններն անվավեր ճանաչելու և ավագանու ընտրությունների վերաքվեարկություն նշանակելու մասին.
- 4) համապատասխան համայնքների ավագանիների ընտրություններն անվավեր ճանաչելու և նոր ընտրություն նշանակելու մասին.
- 5) համապատասխան համայնքների ավագանիների ընտրությունները չկայացած ճանաչելու և նոր ընտրություններ նշանակելու մասին:»:

Թիվ 30 տարածքային ընտրական հանձնաժողովը, հիմք ընդունելով Ընտրական օրենսգրքի 74-րդ հոդվածի 6-րդ մասի 1-ին պարբերությամբ սահմանված և 141-րդ հոդվածի 2-րդ մասով սահմանված իրավակարգավորումները, ամփոփել է Շիրակի մարզի Ամասիա համայնքի ավագանու 2021 թվականի դեկտեմբերի 5-ի ընտրությունների արդյունքները և 2021 թվականի դեկտեմբերի 12-ին ընդունել է թիվ 23-Ա որոշումը, որի հիման վրա ընդունել է նաև Ընտրական օրենսգրքի 141-րդ հոդվածի 2-րդ մասի 1-ին կետով սահմանված որոշումը, այն է՝ 2021 թվականի դեկտեմբերի 12-ի «Շիրակի մարզի Ամասիա համայնքի ավագանու 2021 թվականի դեկտեմբերի 5-ի ընտրությունների արդյունքներով Ամասիա համայնքի ավագանի ընտրվելու մասին» թիվ 25-Ա որոշումը: Նշված որոշմամբ ամրագրվել է, որ Ամասիա համայնքի ավագանին ընտրվել է և մանդատները բաշխվել են հետևյալ կերպ՝

- «1) «Ամասիա-Արփի» կուսակցությունների դաշինք 6 մանդատ.
- 2) Հայաստանի Հանրապետական կուսակցություն՝ 3 մանդատ.
- 3) «Քաղաքացիական պայմանագիր» կուսակցություն՝ 6 մանդատ:»:

Վերը նշված որոշման համաձայն՝ ավագանու անդամների բոլոր թվով 15 մանդատները բաշխվել են:

Թիվ 30 տարածքային ընտրական հանձնաժողովի 2021 թվականի դեկտեմբերի 12-ի թիվ 25-Ա որոշումը դատական կարգով չի բողոքարկվել:

Ներկայացված դիմումով պահանջվում է «ընդունել որոշում ՀՀ Շիրակի մարզի Ամասիա խոշորացված համայնքի ավագանու անդամների 05.12.2021թ-ի ընտրությունները չկայացած համարելու մասին» այն դեպքում, երբ քվեարկություն անցկացնելու պարագայում նման որոշում կարող էր ընդունվել բացառապես Ընտրական օրենսգրքի միայն 74-րդ հոդվածի 6-րդ մասով և 141-րդ հոդվածի 2-րդ մասով սահմանված ժամկետում, ընդ որում, նշված ժամկետում կարող է ընդունվել Ընտրական օրենսգրքի 141-րդ հոդվածի 2-րդ մասի 1-ից 5-րդ կետերում նշված թվով 5 որոշումներից որևէ մեկը, ինչը նշանակում է, որ մեկ որոշում ընդունելու դեպքում մնացած 4 որոշումների ընդունումը բացառվում է:

Դիմումատուները չեն վիճարկում թիվ 30 տարածքային ընտրական հանձնաժողովի 2021 թվականի դեկտեմբերի 12-ի թիվ 25-Ա որոշման իրավաչափությունը, ինչը կարող էին անել մինչև 2021 թվականի դեկտեմբերի 15-ը, և միաժամանակ պահանջում են նույն ընտրությունների արդյուքներով կայացնել մեկ այլ որոշում՝ ՀՀ Շիրակի մարզի Ամասիա համայնքի ավագանու ընտրությունները չկայացած ճանաչելու մասին, ինչն իրավաչափ չէ:

Վերոգրյալի հաշվառմամբ՝ թիվ 30 տարածքային ընտրական հանձնաժողովը գտնում է, որ դիմումը՝ «ընդունել որոշում ՀՀ Շիրակի մարզի Ամասիա խոշորացված համայնքի ավագանու անդամների 05.12.2021թ-ի ընտրությունները չկայացած համարելու մասին» պահանջի մասով երթակա է մերժման:

Դիմումում ներկայացված երկրորդ պահանջը վերաբերում է ՀՀ Շիրակի մարզի Ամասիա համայնքի ղեկավարի 20.12.2021թ-ի ընտրությունը ապօրինի ճանաչելուն և համայնքի ղեկավարի ընտրության մասին արձանագրությունը և/կամ որոշումը վերացնելուն, որի քննությունը առարկայական ենթակայության տեսանկյունից դուրս է թիվ 30 ընտրատարածքային ընտրական հանձնաժողովի իրավասության շրջանակներից:

Վերոգրյալի հաշվառմամբ՝ թիվ 30 տարածքային ընտրական հանձնաժողովը գտնում է, որ դիմումը՝ «ՀՀ Շիրակի մարզի Ամասիա համայնքի ղեկավարի 20.12.2021թ-ի ընտրությունը ճանաչել ապօրինի և վերացնել համայնքի ղեկավարի ընտրության մասին արձանագրությունը և/կամ որոշումը» պահանջի մասով ևս ենթակա է մերժման:

Հիմք ընդունելով վերոգրյալը և ղեկավարվելով Հայաստանի Հանրապետության ընտրական օրենսգրքի 47-49-րդ հոդվածներով՝ թիվ 30 տարածքային ընտրական հանձնաժողովը

ՈՐՈՇՈՒՄ Է.

1. Դիմումատուներ Մերգել Մուրադի Ղարիբյանի, Հայկ Բագրատի Նիկոլյանի, Արմենակ Արամի Արամյանի, Սուզաննա Եղիշի Մանոյանի, Գրիգոր Հովհաննեսի Պետրոսյանի և Անահիտ Զիլմխանի Մելքոնյանի ներկայացուցիչ, փաստաբան Մհեր Շահնազարյանի 23.12.2021թ. դիմումը մերժել:

2. Որոշումն ուժի մեջ է մտնում նիստում հրապարակելու պահից:

3. Որոշումը կարող է բողոքարկվել Կենտրոնական ընտրական հանձնաժողով կամ Հայաստանի Հանրապետության վարչական դատարան օրացուցային 3 օրվա ընթացքում:

***Թիվ 30 տարածքային ընտրական
հանձնաժողովի նախագահ՝***

Ա. Խաչատրյան